

Ène viye afwêre a Bayamont.

Mes parints m'a-n avin câzé dins l'timp, même coume c' ére yôk du vî et d' putot délicat, i n' inmin nin d' trop d' a câzer, surtout avu les afants. Il ére kèstion d'ène famiye k' on loumot les « HILAIRE », (c'ére lu prénom du pére), mès leu nom d' famille astot « LOOSVELT »

Cè ki m' a-n avot dmèré, c'est k' on n' les inmot wêre ou viadje.

Il è falu k'a wêtant après « Bayamont » su Internet, dju rtume su deus foyes du leu jénéalojîe : justumint, les cîes du l' Hilaire et du sa fame Séraphine Lamotte.

Dj' a-n ê rcâzé avu l' Josèf Djômote, ki m'è ranêré la mémwâre.

Ces djans la fjint avu les Boches al guêre du 14 ; et an plus du ça, c'ére des voleurs ki hapint toudi yôk dins les mwêjons. Lu Josèf m' è dit k' i catchin a l' intrée dul çumintîre, duzous ène dale dul tombe des Gillet ? les cayèts k' il avin volé.

Dju n' counus nin la rêzon du fêt ku dj' va dire, mès i s' fwêt ku yink des valèts avot fwêt yôk anavers la djon.nesse du Bayamont, ku les djon.nes djans l'ont pourchû pou l' trikker coume i fât, k' i l'ont rdjondu (lu Josèf m' è dit ku c' ére dulé l' Rond Pont, atère Wâjî et l' Moncê) et ku dins l'algarade, i li è lêchî la hozète. Avin -t-i toké trop fwârt ? Ku s' è t-i passé à djuste ? I parèt ku, cand on l' è rtrouvé, il avot les pids à l'êwe (du bî, dju supôse).

Dju sans anute lu 11 du fêvrî an 2001 et dju n' a sés nin d'pus. Dju n' counus nin l' anéye. Astot-ce tins dul guêre ?

Dju m' vas wêtî d' a sawè dpus....